

## 一條田岸小路

甘是元宵迎古仔燈 e 鬧熱聲，將土蟲攏拍醒啊？無張遲 ng-á 已經播落，看著幾隻烏鶯在相逐，才發覺「春天」早就來報到啊。

捲潤餅之後，春雨落未煞。人講「春天後母面」，這款天氣乎人掠未準她 e 心情，衫褲時常晒甲溼漉漉。不過，「清明穀雨，寒雨虎母」，此時雨水那落嚟夠，稻仔就袂嬌了！看來《四月望雨》e 心願，自古皆然。「有几工嚟去散步啊？」心肝內思念 e 是那條田岸小路，就親像老朋友同款，久嚟看到，會掛念、會相等，等我不管時有閒，去 kah 行行看看咧，才會感覺實在。

這條田岸小路，是沿圳溝鋪設 e 產業道路，自頭到尾，有三、四公里遠，歸條路不只仔乾淨，麻有夠闊，免驚相閃車，尚稀奇 e 是沿路行，亦可以欣賞到兩邊 e 好景致，真是一兼二顧。因為按呢，附近 e 人攏 kah 當作運動 e 路線，尤其是黃昏時，一路上人看人。用行、用走、抑是騎鐵馬 e，尅某、父仔子、帶孫 lap 囡仔車 e，或者是朋友歸陣那行那開講 e，大家不約而同攏總出來呀！連狗仔麻順勢帶出來繞繞咧。甘那腳手卡慢一絲仔，就享受袂到日落 e 美景、暗暝 e 涼意。

「同是天涯運動人」，雖然互相嚟熟識，因為時常看到、遇到，麻會點頭、微微仔笑。「四海之內皆朋友」，人 kah 人之間就愛結善緣，

甘不是？一屑仔真情，就會乎世界變甲不同款。

「來運動喔？啊汝佗位來？」田畔 e 阿伯、阿桑真熱情，會 kah 阮相照問。阮對 in e 田好奇，問東問西；in 麻對阮真隨和，逐項講透枝：「這是稗仔不是稻仔，就愛看乎清認乎明」、「粟仔用 ia e，卡嘸焦勻；用播 e，才卡有收」。阮雖然袂講「五穀不分、五體不勤」，但是 kah in 咖啡色 e 面容比起來，阮 e 青白就自嘆不如了。作穡人真 phah 拚，無論透風落雨、日頭外炎，不管時攏屈在田中央，摸來摸去，娑草、作岸、ia 肥、種菜，歸年通天做袂煞。人講：「三工早，趁一工；三冬早，趁一冬」，「對時、趁早」是 in 行動 e 指南；「掘力、勤儉」是 in 一世 e 信仰。時常看到 in 坐店田岸邊，互相交流、互相鼓勵，衫褲 bak 甲全土，麻袂置意；收好收壞，攏感謝天公伯仔保庇。這種天寬地闊、簡單 e 滿足，平凡 e 快樂，只有在作田人 e 身上，才看 e 著吧！

in 雖然平凡，雙手卻是創意十足。詳細看，每一區田攏有家己 e 巧思，「土地」是 in 設計 e 舞台；「作物」是 in 梳妝打扮 e 模特兒。有 e 田真性格，已經站無路啊，攏有法度種一排 e 番麥 kah 土豆，只要有所在，就有期待，就算是畸零地，麻看到圓 khong 仔內，栽了瓠仔菜瓜，竹仔架俛路邊，斜斜編好、khòe 好在等候啊。

謝先生 e 田相特殊，連溝墘邊 e 美化、綠化，麻袂昆分，攏總檢

檢來做。台北草炭甲歸條路攏是，日日春各種花色開甲真豔麗，紅花綠草，閣穿插幾樣 e 葡萄、桑葚 Kah 苦苓，宛如河邊公園，人人 o-ló，乎人流連。溝仔內那乎雜物仔塞著，他會撩落去清理，腳手 bak 甲黑啁啁，有人以為伊在摸蛤仔，走俚來看，才知影是天大 e 誤會。伊在顧田真用心，又能「惜花連盆」，真情對待生活 e 環境。這種 e 「小人物」，才是天地自然中，真正的生活家、哲學家。「來坐啦！」每擺看伊坐店草仔坪，感覺伊無比 e 輕鬆 kah 滿足！那種與土地相依為命 e 形影，一直印在我 e 腦海！有一工，莊稼人那失去了田，嚙通種作，會悲慘到什米程度呢？每擺看到有田在園土，beh 起工廠，真深 e 遺憾，使我嚙願閣想落去。

發現這條田岸小路，已經三年外！來來去去，嚙知走了幾百擺？猶原未厭！走去心輕鬆，走轉很快活！小路上那碰到「二年三班」e 阿伯仔，騎鐵馬經過，看是 beh 番薯葉仔？抑是蔥仔、蒜仔？閣會分寡乎我，他講：「家己栽一橫，卡贏看別人。」伊教我按那分辨「水雞仔抑蟾蜍 e 腌嬰仔」，伊教我「輕輕鬆鬆過一工，煩煩惱惱麻一工」e 人生體會，阮真歡喜熟識這些 e 田莊阿伯，乎我學到真濟農事知識；乎我看清四季 e 變化，親像看清人生 e 無常同款：嚙論好歹，攏愛吞忍，攏愛接受。

外國有「左岸咖啡」，阮這裡有「田岸公園」。那有朋友來彳亍，

袂想去咖啡廳、袂想去媽祖廟，只愛招來去這條田岸小路散步，沿路介紹，沿路看，看阮田莊處處美麗 e 好風景，乎大家心涼脾透開，這就是我相誠懇 e 分享，相好禮 e 招待。